

介亭文集

序

先儒嘗云文非乃闢於方教人心者不
必作而程子亦云一命爲文人便無足觀
非薄文也蓋以學人爲文必立本于文之
先而致見於文之後本立於文之先而
何道德是也致見於文之後而何事功

是如段陽公有見於此故送徐無靈
南歸序於古人而云三不朽者亦未
輕重及愛言之之陳法務采色諱於音
以爲能則其所爲炳々烺々亦苟苟而
已何足貴哉何足貴哉吾善於江峽
而先生介亭文集之深有味乎其言

之如先生懷甯人。雖後劉海峯徵君
道得閩詩古文之法。故其爲文波瀾態
度。近似海峯。詩上清雅拔俗。深出於
五言。與當時譚爲古文詞者。迥然
先生亦未嘗多言。執讀後而抗顏以而
先生亦以此自足。以進士內長銓曹外

典選郡邑莖苴不邪至門接襄茂夷先
教化浚飾刑元邕聖在人願南雅太史
崇修修安二吳太守傳先生其一也
今人立功先生志可以垂愧矣及觀其筆記
履歷述之諸書因事顯情即物寓理
美非闡天人之典示勸戒之方無心為文

兩天之至文舉者能過為彼徒以文
人自命者先生何造於此乎以道
而計其為先生遠矣先生舊有文集
六卷外集六卷請鈔一卷筆記一卷
居暇述之二卷北上何錄三卷惟安
府志叙之一卷于後述兩卷二卷獨未

山房四書文一卷陸續編下卷已雕板以去
久矣今逢兵燹板燬其令孫海門太守
用舊本重刊海上而屬余序以弁其
余再四披讀盡其文者合於先儒所
云而與余夙昔所信亦若合符焉不
揣冒昧僭書於其首以同法甲戌孟

夏月沅陵渡學吳子色拱

兵部節兼都察院右副都御史巡撫蘇等處提督軍務兼理糧餉等事董致增謹
題爲據情轉詳

題請入祀事據兼署安徽布政使司按察使李奕疇詳
稱據安慶府知府姚鳴庭詳據懷甯縣知縣左輔詳
准儒學教諭葉士琦訓導史元京移稱據本縣紳士
舉人方達徐國治候選布政司理問翁立本孝廉方
正職增生李榮章張厚載生員江辰元魯琮路一興
查炳蔚丁芬桂王朝聘洪廷椿趙燾職監生楊瑞徽
查永梓等呈稱緣本縣已故

誥授朝議大夫原任雲南臨安府知府江濬源者品由天
植學本人師風樹蚤凋痛較深於烏哺雨床相對情
彌篤於鵠原南曹卻暮夜之金李蹊戒絕東井耀虛
明之鑑棘省局嚴當銅虎之分符越碧鷄而作郡庭
閒累日吏但縣蒲咸始行春氓皆勸穡牒修校舍成
都比鄒魯之墟祠安忠魂孤竹復夷齊之祀撫棘蠻
而不擾遺愛在人驅潭鱷以無災至誠及物固循聲
之卓爾繇異績之昭然矧夫螳臂爭呼犬牙錯壤勢
窘則蟻驚潰穴言訛則狐伏叢祠獨能帷幄運籌設

三條而募上遂使吏民安堵堅衆志以成城凡此著
勞實堪崇尚至乃廣賜同族并推負郭之田宏獎後
生仍列授經之席闡孝忠之潛德風勵梓桑紹賢聖
之微言宿探河海所以儒能範俗歐陽配食其鄉吏
足庇民召父奉祠於冢立功垂法遠宜述夫禮經核
實循名上克承夫

天訓伏惟紀綱世教坊表人倫採輿情以太史之軒臚
旌典於先生之社則庶幾表章不朽大君子能發幽光
抑因以矜式方來凡郡人共瞻茂舉伏乞轉詳請題

崇祀鄉賢用光俎豆以勵風化等情到學覆查無異
該懷甯縣學教諭葉士琦訓導史元京查看得已故
誥授朝議大夫原任雲南臨安府知府江濬源學窺道奧
譽藹儒宗由仁義以擴其端主敬誠而敦於實生無
妄語幼齡儼似成人志在敏求凡事惟期反己奉庭
闈而允若克承菽水之懽全手足以友于爾篤棣華
之愛多士競從之學欽企楷模碩儒興化於鄉感孚
桑梓子臣弟友躬行者諄與人言濂洛關閩心慕者
引爲己任遂乃槩鉛百氏斲於羽翼六經息羣喙似

是之非申古賢未傳之秘惟士林所共仰早

帝簡其頻膺考績銓曹咸稱正直掄才關陝並頌公明至
於昉町分符輒轡向化慶修鄉校揚士氣於絃歌加
慎邊防輯夷情於寨峒卻秋臺而弗受長保清名驅
水族以無驚獨徵誠意治劇郡者十載吏民偕泐口
碑養沈疴者四年圖史倍勤韋布似茲耆宿允符鄉
里之僉稱緬厥芳徽堪荷

國家之盛典理合取具閭邑紳士及族隣甘結加具印
結並備造事實清冊移送核轉等因該懷甯縣知縣

左輔查看得已故

誥授朝議大夫原任雲南臨安府知府江濬源學有本原
行爲坊表施家有政孝友無間於人言趨省陳謨絲
純弗愆於公度主羣材於鵷首玉笋成班捧良笏於
鶴廳墨書注考迨一麾而出守卽五袴以興歌人居
廉讓之間脂膏不潤功惟義仁之用氛祲皆銷任長
孫治易土風化行南掌韓潮州檄驅潭鱷頌泐黎江
方錫高車以旌功旋掛胡牀而引疾闡濂洛之精蘊
著述等身尋釣游之舊蹤恬愉樂志音不聞於偃室

品獨冠乎皖江洵里黨之靈光實人倫之標準宜昭
祀典允洽輿評茲准儒學移送冊結到縣覆查無異理
合加粘印結轉詳到府據此該安慶府知府姚鳴庭
核看得懷甯縣已故

誥授朝議大夫原任雲南臨安府知府江濟源志趨賢關
學窺藝海力田孝弟勝母之里迴車誦法體經爾雅
之臺設蔭家林斧藻斯蔚爲

國華聖阜焱騰乃衛諸軌路考功則苞苴之途絕校士
則孤寒之氣伸飭吏治而六蠹五蠹之胥匡修學校

而十匠九柯之載庀推

盛世昭忠之例釐祀事者三十五人廣上庠崇文之規
復義學至五十九所訟獄息而桃穠生於園扉禮教
敷而松茂於廣野亭公弩父團練壯而弓箭之社
如雲妖翳狼臙尉候一而道里之圖在掌祭水斐則
嗾巫嚇覩白蜺嬰弗之神驚馴土苗則帶犢佩牛犵
烏獐花之俗革高桅不落先抽到岸之帆驚鳥方驚
遽戢搏霄之翼義田贍族克廣仁親厚德居隣兼培
風俗文章紹南學之宗行誼述西銘之悃述其出處

之節洵爲名實之符宜祀鄉賢以順輿論茲據該縣儒學造具冊結申送前來理合查明加結詳請核轉等情到司據此查禮部則例內開崇祀名宦鄉賢該督撫會同學政合詞具題並將事實冊結送部詳核於歲底彙題等語該兼署安徽布政使司按察使李奕疇核看得懷甯縣已故

誥授朝議大夫原任雲南臨安府知府江濬源幼挺淳至長裕修能承橫經負耒之傳素風不墜守稽古居今之訓先志是繩至性自篤於庭幃天顯有加於跼萼

文則醇而後肆一稟乎雅正清真義則擇焉必精務
守乎關閭濂洛導士林以器識啟後學之顛愚已徵
學有本原宜見士相模楷及夫通籍而後觀政銓曹
授職之初考功選部門庭闕寂自稱席豫公明車馬
喧阗不擾山濤簡識典試而真材悉拔大搜滄海之
珠衡文則僞體必裁無雜藍田之玉以至報最金華
握符銅竹居先廉讓政始清勤示蠻貊以恩威迫士
民於樂利勤課藝而優廩給復義學者五十九區時
濬洩以灌田疇修水利者六十餘所競說文翁治蜀

下縣亦易其風更言吏部居潮惡水亦除其毒若乃
遂初賦後引疾來歸置義田以贍同宗分餘俸而賙
舊戚杜門四載依然窻下儒生掃榻終朝何異村中
學究既有爲而有守抑立德以立言夫二千石有益
於民用永載夫棠黍而鄉先生可祭於社亦長配夫
桑榆統觀故宦生平深合此邦籲請可比瞽宗之祭
用昭尸祝之崇茲據該府縣學查明取造事實清冊
加具印結前來相應將送到冊結詳請會核

題請入祀鄉賢祠等情呈詳到臣該臣看得懷甯縣已

故

諸授朝議大夫原任雲南臨安府知府江濬源性兼孝友
學有淵源負耒橫經志無忘於先訓登雲通籍事不
愧於科名迨考績以分司旋持衡而典試門無竿牘
絕請謁於銓曹壙滿荆蒿峻關防於使院十年治郡
萬里歌碑廿五人顯視闡幽推異數褒忠之美二千
石分廉勸學體

聖朝養士之隆興田利者萬家免差徭者億姓邊疆不擾
何煩鞭打箠笞夷性俱馴無敢陵升莽伏救鯁患而

文驅崇華人盡稱神發虎符而檄戒貪發衆皆呼母
歸田贍族澤遍親朋履畝催科化行牧豎幼本耽乎
鉛槧老猶嗜夫縹緗鑄史銘經彙五萬言作千秋之
鑑分條析縷綜數百家成一氏之書况宦績之昭彰
復士林之模楷宜分廟食俯順輿情據兼署安徽布
政使李奕疇查明取具事實冊結詳請會

題前來臣覆核無異相應

題請入祀鄉賢祠以光

盛典除冊結送部查核外臣謹會同署兩江總督臣章

方輿彙編
輿地典
四
熙安徽學政臣萬承風合詞具

題伏乞

皇上睿鑒勅部議覆施行爲此具本謹題請

旨嘉慶十五年二月初一日題十六年正月二十二日准

禮部咨爲彙題鄉賢事儀制司案呈禮科鈔出本部

彙題安徽等省故宦江濬源等入祀鄉賢祠一疏於

嘉慶十五年十二月十四日具題十六日奉

旨依議欽此相應鈔錄原題行文安徽巡撫遵照辦理可

也

事實節略

故宦原任雲南臨安府知府江濬源安慶府懷甯縣人由廩生中式乾隆庚寅科舉人戊戌科進士歷官吏部考功司主事考功司員外郎乾隆己酉科充陝甘鄉試正考官洊陞稽勲司郎中俸滿補授雲南臨安府知府護雲南分巡迤南兵備道

大計卓異加一級回任候陞因患病請假回籍卒於嘉慶十三年九月十八日距生於雍正十三年八月初二日年七十有四生平事蹟未易更僕數僅以人所

共知者略陳之

一故宦生有至性幼從師讀父力田恒訓以奮志讀書輒潛然泣下不已父沒事母尤孝謹家貧授徒於外遇母有疾則心動驚顫不安急走歸侍湯藥俟愈始回館兩居喪哀毀如禮忌日噓唏流涕上
有三兄自幼至長入朝夕歡聚出靡日不思旣三兄早世仲兄乏嗣以孫爲之後憫諸姪孤貧無以業多分財經紀之懇至周析甚於所生

一故宦爲諸生時束躬砥行非聖賢之志不敢存佩

先哲一言勿忘至老猶舉以教戒子弟居恒聞人
善必進問之懼不卒聞聞人不善以他語雜之若
惟恐其語之盡所交遊皆一時知名士課生徒不
專取文藝一言一動示之楷模雖孩穉未嘗以中
下之姿率鄙薄而簡棄之也故所成就多謹厚植
品之人

一故宦成進士官吏部時早夜趨公清勤自矢考功
事稱浩繁所居輒辦每定稿必議當其情同司歎
服外州縣至不識其官居吏部苞苴之迹絕於門

見堂官必於公所未嘗一謁以私乾隆五十四年
奉

命爲陝甘鄉試正考官所取士寒素績學者居多奔競絕無
所倖云

一故宦守臨安時每月朔望集耆老士民恭講

聖諭廣訓詳析疏解之以宣布

德意謁

至聖廟以時完治棟宇增飾禮器樂舞率僚屬及諸生行
舍菜禮爲陳明經飭行漸進成人之路郡西門外

表忠祠歲久傾圯慨然復修因釐正祀典所宜者
自前明忠烈張公輔以下三十有五人第其官階
贈諡祀焉而附從死軍士於右立前明建水州牧
劉僖閣家殉難之墓於白鶴山下招其魂弔之輯
府志多載其鄉邦人物風示後人而歲以孝義貞
節請
旌者不可勝數

一故宦於郡崇文書院多出俸招致賢師優給生徒
膏火每會課必親詣講堂訓誨如教家子弟然取

諸生材質通敏者十餘人時延與講學凡課藝必刊削之使歸於雅醕數歲次第撥科以去又札州縣復義學五十九所田若干畝租若干石而選諸生飭行檢有文者爲之師繇是士競勸學人材蔚興郡中化之翕然從治

一故宦念郡屬素有夫馬之役病民禁一切濫應每出行部概從民價僱募爲之倡蒙自棉花行以有害商旅請無庸添設建水觀音廠以驚擾夷地請永遠封閉歲行視郡縣水道時其瀦洩捐俸訖工

民獲溉田利者萬家勸修橋梁五六十餘所多爲
文以紀之父老榮焉復建水義倉夏賑以贍窮而
無告者

一故宦治郡務以德化部民某桀黠教人訟陰持官
吏短長故宦召切責之許自新訖十年某死誓閉
絕又有同父兄弟以分析田房不公訴者集訊少
長咸在故宦不遽問所爭之是非先反覆引徵論
之以大義於是長者各嗚咽不能言子姪亦俱從
後牽長者之衣相泣求和而去復爲兄弟如初

一故宦到郡接見土官待以恩禮禁吏人不得索土官一錢惟諭以安邊固圉上報

國恩頒條教令土司掌寨於隘口置目練五名給循環簿填註商販貨物之數以時參考毋久稽留藏帶器械不法者禁勿入而豐社江藤條江黑江各渡壤接越南南掌夷界飭練防守禁無與外夷交通內地民不得與夷爲婚姻其僑居夷地者令立甲頭編客總諸非以財盤剝估奪皆聽爲良民而窮治煽誘告訐者罪繇是獄訟衰息邊界帖然嘉慶

二年貴州興義狝苗滋事蔓及雲南平彝羅平師
宗等處近與郡境毗連奉上调所屬土練千名往
勦各土司爭先以應至千五百餘名皆由平日撫
綏控馭之得其道也

一故宦鎮靜有餘臨事不動聲色方狝苗擾及雲南
邊境郡屬訛言驚恐乃諭郡城富戶出貲貧戶出
力募鄉勇六百名晝夜巡防其阿迷及建水曲江
各屯寨皆團集如法嘉慶四年猱匪跳梁故宦時
護理迤南道篆駐威遠督理後路事宜乃謹邊備

察地圖核道里數安兵設練儲餉立臺募夫役徠
難民宥脅從釋亡辜撫集生全故難夷勸歸邊鄙
無擾焉

一故宦自奉儉約在郡十年優戲人至不入郡境署
非賓友至厨舍蕭然事上官甚和且謹以禮自持
卒亦無所屈念牧令蒞民最近嘗錄所作戒貪檄
以規其或家本清苦則出所餘俸金贈之更勅勉
爲廉吏至郡屬皆感且愧務自斂戢云納樓澧社
江六蓬渡螞蝗爲祟日覆舟殺人道梗土司普澤

請建楊泗鎮江王廟故宦爲文遣祭之是夜天大
風走石水雷鳴翼日崇遂滅行旅謠詠之嘉慶六
年補行四年

大計經前雲貴閣督部堂書公麟雲南巡撫部院初公
彭齡保薦卓異以老成明幹辦事精詳操守廉潔
聲名甚好具

題送部引

見奉

旨回任候陞後以病去官日遠鄉百姓扶老攜幼填溢街

巷走送者或遠出數百里不忍還

一故宦自告病回籍後置義田以收族遇困乏輒復
調卹諸親屬故舊婚葬無力者仰助焉往來城鄉
過里門必步里中老人多喜問臨安時事故宦備
述其民勤儉風俗淳厚因以教鄉人其老人益感
歎加禮鄉人有不善度其先已聞知匿不敢見有
造門言事者或中路自悔相與責曰此何事何以
告此君獎誘後進以漸示可成引其所長使自知
所短間周行阡陌間視毗夫賈子樵童牧豎各依

所職業懇懇誨導之俾聽者善意充盈各油然而退也

一故宦性本剛介落落與俗寡諧然終不爲矯激蘄絕之行人晤對之者鄙念無自萌久但覺和藹之氣溢眉宇凡治家守官處已接物諸大端壹以誠敬自持久而弗懈晚歲益粹然常獨居一室蚤起坐一榻終日無惰容或手寫所著文或觀書夜半不輟時時爲子弟述先世忠厚勤苦旁及遠親故老諸隱德可稱者客至雖狎從之遊不衣冠不見

也嘉慶十二年春夏間疾屢作猶日會後生雋異者八九人課制藝文講論弗倦至病垂殆猶記爲父忌日以不能自起臨奠言之有餘憾然易簀前二日命子取所著古文某序某行當易幾字某傳從其子孫請也當以家傳別之告子以已生平之爲人惟坦居平境嚴守正關而已復諄諄教子以讀書向上勉爲正人餘無他言臨沒子泣問所患苦應曰吾一身困劣不堪因指心曰幸此處終不動耳

一改宦篤志好古晚以聖賢之道爲己任將推己所
學者以及人也著有介亭筆記八卷居暇適言二
卷本二書所以爲言者壹主於平易簡明斬以維
世教而牖人心見諸行事之實非扶翼聖學者不
敢以存故纂輯尤爲矜慎又有臨安府志二十卷
于役迤南記二卷北上偶錄三卷介亭文集六卷
取關係大者入文集次曰外集以別之介亭詩集
一卷附南旋草一卷獨秀山房四書文一卷獨秀
山房四書文續編一卷并付梓行世

臨安張江二賢太守傳

吳縣顧 純

張玉樹號蔭堂武功人乾隆十六年進士五十六年
由山東牧授臨安府知府甫之任卽修葺書院嚴立
課程月進諸生童講學作文以誘進其行誼每朔望
於城內外親講

聖諭廣訓集老幼工賈及荷校之犯皆令環聽其遠在數
十里外者責成義學師春夏間將倉存米穀出糶民
無凶歲南城三河源皆出石屏異龍湖迤邐西來灌
溉田園百餘里時沙壅爲患乃預於冬春捐貲挑濬

農圃皆受其利又小錢盛行銀一兩至四千市井相欺禁之則吏緣爲奸夫馬應役者復多浮濫民甚苦之玉樹悉革其弊大吏檄通省仿行玉樹每五鼓藝燭閱案卷辰刻坐堂皇訊鞠不事刑求具得其實自是所屬州縣皆無積案越二年因勞成疾郡之民夷日踵至問省視藥甚有裹糧越十餘程來禱城隍神以冀痊者卒之日衆方環哭忽見玉樹於鏡中近之則無遠視之仍儼然在焉衆皆遙望羅拜數日後乃滅及柩回或送至其鄉視其安厝始回後遂塑其像

於各廟中歲時致禮至於今不廢繼玉樹者爲懷甯
江濬源號岷雨乾隆四十三年進士五十九年之任
凡玉樹所設施皆遵循勿廢紳士以義學讀書人少
欲裁之并縣城書院濬源不可謂義學爲教化鄉愚
而設若裁之是縣城有學而四鄉無學矣識者謂其
知大體嘉慶二年貴州興義逆苗叛延至廣西州之
五槽隔阿迷僅百餘里濬源率紳士募鄉勇六百訓
練以防禦之民得無恐明年地震石屏尤重男婦斃
者千餘人悉捐廉煮粥蓋草棚以安集之後攝迤南

道篆猓黑亂總督檄濬源領土練千餘星夜由普洱
威遠會剿士卒奮勇不踰月戡事臨安納樓土司地
連南掌國忽有南掌人擁衆至納樓界稱其國舊有
地爲土司侵佔請畫還濬源檄以我

朝版圖有定制何得妄冀干越南掌人畏服竄去時大
吏方薦舉而濬源引疾歸十三年九月卒於家聞其
著作甚富在滇刻者有獨秀山房前後文集介亭筆
記北上偶錄干役迤南記板存府署中

艾生前輩將任臨安守以前守此土者獨稱張

江二君見於余所著滇南採風錄中特枉訪索
觀余觀二公之所爲皆以興學爲首務而江公
之不使城與鄉偏重與陳文恭教夷人急於教
漢人教童子急於教成人之言相合其意尤爲
深遠余昔在滇時考文恭公所設義學三百六
十餘其存者尙有大半雖燕麥兔葵有名無實
擬復其舊而州縣與余無統屬勢必不行因與
韓方伯芸舫前輩商之欣然自任未幾陞安撫
遂中止今韓公復來撫滇適艾生前輩守於是

邦則文恭公之遺績當重見於今因將此傳錄
出贈行以誌旗人之幸固不僅爲臨安一郡慶
復得張江賢太守也侍顯蒞時在道光元年三
月

朝議大夫臨安府知府江君墓誌銘

并序

桐城
姚鼎

君諱濬源字岷雨懷甯江氏曾祖諱守侗祖諱汝湛
考諱嘉椿祖考皆以君貴贈朝議大夫君以縣學生
中乾隆三十五年舉人四十三年成進士授考功司
主事晉員外郎又晉稽勳司郎中兼考功事君在考
功十餘年貨賂不敢及門吏不敢爲姦弊乾隆五十
八年出爲雲南臨安府知府臨安邊遠民寡知義君
一以道理諭之訟者至君呼至案與言如鄉里至不

可教乃威以法有兄弟以財訟者君爲言骨肉之誼
其辭痛甚言未終訟者泣涕求罷訟復於好後訟者
益稀臨安所屬夷氓土司十掌塞十五舊土官謁知
府其儀嚴甚知府坐堂上如神堦下跪拜惶迫不聞
一言而出君獨接以和易賜坐與問夷情具悉土官
感恩奉命愈謹而事大治居寡燕樂廚舍蕭然優人
跡不至其郡而境內小大績無不舉縣皆立義學爲
立法甚密任內公私修橋梁至五六十君自爲文以
記臨安民以爲榮嘉慶二年貴州興義苗爲亂蹂近

雲南君餉土練防禦賊不得入境後二年君護迤南
道值大兵剿猛猛土司君駐威遠督理防剿有功以
卓異薦入都旣引見反臨安待陞君以年七十請
致仕歸後五年爲嘉慶十三年九月辛巳卒於家君
少工文章爲諸生時嘗事劉海峯先生聞古文法著
介亭內外集十二卷介亭筆記十卷其在臨安禮社
江六蓬渡有螞蝗之孽時覆人舟君爲文祭神其夜
大風雷鳴若有物隕墮祟竟滅人以配昌黎之告鱷
云在威遠時作邊防四篇其言守邊利病尤具在考

功時爲己酉科陝甘鄉試正考官取士稱當焉娶胡
恭人同里太學生熾女事寡姑趙太恭人最孝趙太
恭人謂孫女作婦者宜效之又能以勤儉助夫爲廉
嘉慶四年正月卒於臨安官舍年六十四生七子甲
寅科舉人彥和己酉科舉人景綸附監生郁才監生
景綬候選縣丞甸附學生景綬廩生爾維君喪時有
孫十六曾孫六嘉慶十五年 月葬君於縣西北四
十里辜家冲山麓胡恭人附桐城姚鼐爲之銘銘曰
講仁導義德被邊邇以及夷裔樹績佳吏內原儒藝

有助賢嫗稱其翟裼爰安同瘞

皇清誥授朝議大夫雲南臨安府知府前吏部稽勳司郎

中考功司員外郎考功司主事顯考岷雨府君行述

嗚呼已矣繼自今不孝等長爲無父之子矣憶吾母

之卽世十年於今今又禍延吾父嗚呼痛哉不孝彥

和以本年會試未第留京師不得親視含殮不孝郁

才等奉侍無狀祈禱弗虔懷慟終天百死莫贖不孝

兄弟於是聚泣而言曰吾父時月教誨不孝兄弟之

言與所以企望不孝兄弟者吾兄弟尙勉勉行之顧

吾父守已以嚴居官以正立心以厚爲學以勤當代

士君子類有能知之者而知之未必具詳其縷悉迄

今日而闕佚弗紀也則不孝兄弟之罪滋大也謹於

苦由昏瞽追述粗能記憶者不敢辭掛一漏萬之咎

亦不敢加以亡實之言府君姓江氏諱濬源字楸莖

又字岷雨一號介亭先世居鄱陽明初避兵徙懷甯

代傳耕讀十世祖諱之鯤三副賢書官厯句容縣教

諭池州府教授陞河南甯陵縣知縣十一世祖諱一

傑篤行載府縣志十二世祖諱世貢府廩生與宗兄

弟同海同淇兩公日以道誼相切劘所著四書藝彙

曰思齊錄初不識別名字示同心也已兩公先後成進士而公竟以諸生終十三世爲我高祖父諱守侗十四世我曾祖父

贈朝議大夫諱汝湛以勤儉起家好施予族里至今猶能道之配我曾祖母

贈恭人趙太恭人實生我祖父

贈奉直大夫

贈朝議大夫諱嘉椿配我祖母

誥贈宜人

晉贈恭人趙太恭人生伯父長諱猷焯

貤贈朝議大夫次諱猷濟又次諱猷璿府君其季也昔吾

母胡恭人寢疾嘗語及先祖母垂涕泣私戒不孝等

曰爾曾祖母之疾爾祖母刲股療焉爾祖母命我勿

敢言者徒以重爾父戚也然大懼我死爾子孫無復

知之矣府君生數歲嘗與三伯父兒戲偶有所爭先

祖父見而訶之府君卽大感動自後愉怡伯仲無失

色者數十年十歲始受學於叔祖省齋公暨嶽麓趙

先生先是祖父於兄弟行居長念曾祖父獨營家計

之艱因廢書助之庀理而所以佐素亭省齋兩叔祖
讀者米鹽膏火尤極瘁勤兩叔祖旣並成名然終自
以不得畢志於學爲恨時府君從外塾歸則執手泣
曰吾曩者不得已廢書之故兒輩不可不知也兒輩
能讀書則無孤吾志矣祖父泣府君亦泣又顧謂大
伯父曰爾其以吾之佐爾兩叔父學者佐爾弟於有
成亦可矣大伯父泣府君亦泣歲乙亥補縣學附生
學使爲仁和金公牲丙子先祖父卒府君事先祖母
尤極孝謹貧授徒於外遇祖母小疾則在館心動走

侍湯藥俟愈乃還庚辰科試學使武進劉公星煒奇其文諄諄以大器勗之是年食廩餼肄業敬敷書院事桐城劉先生大樾受古文學而烏程閔公鶚元最奇之每試輒高等同邑楊家洙張曾巒王大任諸先生一時願與之遊庚寅舉於鄉同考官廣濟劉公恩訓座師新建曹文恪公秀先仁和汪公新甲午先祖母卒戊戌中會試式同考官大興朱文正公珪座師金壇于文襄公敏中韓城王文端公杰長白嵩公貴初辛卯會試朱公筠得府君卷亟薦未售歎惜者累

日至是喜且告同人曰江生乃今復爲吾弟得也

殿試

賜進士出身以主事用籤掣吏部行走庚子上官議事不
協移咎屬司同時降調者九人府君與焉明年再起
仍行走考功司乙巳補考功司主事丙午題本司員
外郎考功糾察中外官吏案牘浩繁最稱難治舞文
吏一反覆手得因緣爲姦府君持寬平不爲苛察議
不當府君必力爭之貨賂不敢及門吏不敢爲姦弊
然是時家貧甚食指日增京師僦屋居薪米朝夕不

及諸猶子往來南北需費孔艱矣賴先母經理從容
不貽府君內顧憂者毫髮客至治辦餽饌既潔以豐
退視厨下自餐粗糲一盂野蔬一缶而已鄰嫗咸嗟
訝焉已酉奉

命爲陝甘鄉試正考官涪州周公興岱副之旣行一日燕
見於館次謂府君曰廉哉公居考功十餘年外州縣
乃不知公名在吏部

命下友人某欲有所請託屬以多金坐次微語及之府君
正色曰某寒士然天不絕人某安之者素矣君顧以

此累故人耶其人大慚而退府君病革偶語此願不

孝等在側以爲人生遇大節當如快刀剗水截斷中
流徐復申戒之曰噫交友之難爾輩宜慎也是年推
稽勳司郎中兼考功司事癸丑冬授雲南臨安府知
府今相國費公消時爲雲南布政使見而喜曰臨安
轄州三縣五土司十掌寨十有五地方千里南界交
趾爲迤南大府今得賢太守靜鎮有餘矣比到郡土
司掌寨來謁府君問吏故事吏曰見土官胥吏左右
雁行鼓三通舉砲啟門坐堂上土官服戎服佩刀吏

前導門子呼某土官某進及溜拜跪蒲伏聽命起趨
出吏又曰土官獷甚不可不怵以威不怵以威則不
知畏懼宜時檄至府無令久居巢穴翫法不忌府
君皆應曰諾吏退召土官入拜已賜之坐如始見屬
州縣儀告之曰本府奉

皇上命以來守此土也爾土官與共守焉爾能奉職綏爾
民人固爾疆圉是所以報

國恩矣爾土官無事不必來謁本府本府非有事亦不
以煩苦爾土官皆叩頭謝茶畢退拜起如初又諭土

官毋得以一錢獻吏人不得索土官一錢否者悉按以法於是一府大驚或有竊罵土官者而土官皆感泣私相謂曰自今日願出死力惟大人之所命之乃復令土司掌寨每隘口置目練簿記商販出入夷地月日以時參攷毋久稽留禁遊手無業若藏帶器械不法者勿入而澧社江藤條江黑江各渡所以界越南南掌也禁毋與外夷交通內地民僑居夷地久者非有所擾害奪夷產聽之而嚴治煽誘告訐者罪又擇謹愿內民爲字識使掌土司文書夷衆以是便安

之獄訟衰息府君治郡好教化務開人以從善之路
民有訟引近案譬以曲直或感悟持牒還訟辭具呼
兩造康色研問戒胥吏無訶怒示威鄉甿得具吐其
情不忍欺以姦詐判畢申告以小忿可蠲仁愛親睦
之道不可失也後亦竟希詣府訟者先是民某桀黠
好惹人訟持官吏短長吏患之府君召切責許以自
新訖十年某死誓閉絕又同父兄弟有以析產不公
訴者集訊前跪長者鬚髮蒼白子姪以次跪察其色
甚慙府君不遽問所爭之是非第反覆引古友讓者

以徵於是長者各嗚咽不能言諸子姪亦竊從後牽長者之衣泣求和去雲南鹽政及夫馬之役民困弗堪府君在郡定夫馬價壹視民僱爲之倡屬吏無以易之官運鹽置店聽民自買禁吏不得爲姦僞私派擾民後迤西諸郡以鹽故民大騷動欲爲亂延至迤南而臨安獨無事臨安市舊設棉花檳榔青靛蘆茶雜糧魚羝香油楮皮等六行府君以商稀課尠徒恣姦僧抽收病商無益請悉罷六行而課由府措解議上格弗行蒙自縣以添置棉花行請上官趣下府議

力主議罷之建水縣觀音廠產銀礦縣豔其利請試煎採不許人問焉府君曰吾知有利而取之然地方敝矣可若何且無爲多增額以累後人不猶愈乎諸遠見類此歲行視郡縣水道時其濬洩捐俸訖工其建水瀘江象冲塌冲三河及魯峩猊練江多水災捍備法尤悉民獲溉田利者萬家勸修橋梁至五六十餘所多爲文紀之父老榮焉府君以教莫先於勸學莫要於褒賢迺銳意倡導而振起之修治

文廟百廢具舉以奠神棲以篤士心歲時率僚屬及諸

生行舍菜禮爲陳明經飭行漸進成人之路郡西門
外故有表忠祠歲久傾頽府君葺而新之悉罷舊祀
僭濫者參攷志傳而定宜祀自前明張公輔以下三
十有五人第其官階贈諡祀焉表前明建水州牧劉
君億閑家殉難之墓於白鶴山下招其魂弔之臨安
於滇中文稱最輯府志多載其耆老舊人風示來
者而歲以孝義貞節旌者不可勝數表忠祠西爲崇
文書院多出俸招致賢師優給生徒膏火每會課府
君晨詣講堂諸生序入揖階下因進教之懇懇亡已

如教家子弟然復取諸生材質通敏者十餘人時延至便坐講論經義立期日肄舉子業親刊削焉數歲諸生掇科以去念各鄉地僻而多夷札州縣前義學五十九所廢勿修者盡復之查勘其田畝租石或抗欠及隱墾不報責還之以膳塾師毋有所隱選諸生敦行檢有文者迎以爲師益招鄉民子弟爲之弟子教焉出行部過塾則問弟子幾年幾歲今讀某書能屬文與否或更取所誦文指導之其秀者納之崇文書院獎勵甚厚丁巳貴州興義苗反雲南巡撫檄

臨安調集土練千名赴羅平平彝堵剿臨安各土司
額設練不過千名檄到土司爭以練至願自効得千
五百餘人旣遣而賊潰至師宗縣五洛河紅斑渡殺
略寨民移書臨安告急府君亟籌練往防之是時上
官在平彝辦賊但趣臨安再調練六百名以應府君
具狀略言各土司地方非壤狹丁稀現厠散處力農
勢難招集卽毗連邊境不容刻懈巡防且前調練行
裝坐餉費幾數萬該土司財用亦頗殫耗矣如使再
行徵發恐輒派擾愚氓爲患夷方不小賊之在師宗

者糾結邱北五槽沙人益肆焚掠至足底寨等處足底寨距府屬阿迷纔百餘里寨民匈匈不安訛言驚恐府君傳諭鎮慰而得納樓新募練三百名遂遣備阿迷初臨安官兵經川楚前後出師及是徵調殆盡其留守汛卡者老弱羸卒而已乃設立規條募郡中壯士令該管鄉約舉貧戶強有力者應招得鄉勇六百名設什長隊長日督持庫兵演技罷則散城關內外益狎與其曹黨各執耰鋤兵器爲衛父識其子兄識其弟晝夜更代巡防於阿迷略倣團練遺法十名

一甲頭百名一甲總每甲總鑼一鼓一率約保伙頭
人等偵候遇賊蔓入州境卽鳴鑼擊鼓爲號此呼彼
應前躡後追令郡北偏曲江各屯寨圍集如阿迷吏
人按堵鄰郡倚之若隄防賊不得咋入境尺寸戊午
禮社江六達渡螞蝗爲祟日覆舟殺人道畏土司普
澤請建楊泗鎮江王廟府君爲文遣祭之是夜晦風
大作水雷鳴有物當空而隕翼日祟遂滅郡人士聞
之曰昔韓昌黎刺潮州以文諭鱷魚而鱷不爲患潮
人德之如我公乃何獨韓子也已未吾母見背秋七

月石屏地大震壞城郭及居民壓斃民婦數千府君以請帑弗及馳往出倉穀分設粥廠日督紳士視廠所毋毫粒關涉吏胥捐募民出死骨敗屋中葬埋之給材值俾架棚屋以棲帑至因賑卹有加民不饑病冬十一月大兵會剿猛猛土司之叛夷時府君護迤南道篆駐威遠督理後路防剿策應乃謹邊備察地圖核道里數安兵設練儲餉立臺募夫役徠難民宥脅從釋亡辜務在撫集生全六閱月而後歲厥事事詳于役迤南記中府君愍始禍之繇籌善後之策謂

綏懷之控馭之道不可以不素講也於是作邊防說
四篇以告守邊官吏辛酉察廉能以總督書文勤公
麟巡撫初公彭齡薦壬戌北上展

覲及期聞府君當去遠鄉百姓扶老攜幼填溢街巷自府
署至郊外迎恩寺十里不絕婦女觀者相謂曰我公
去矣可奈何郡人士吏民等亡慮道旁百十所案焚
香尊酒踞薦之府君親加慰勞去或立候輿馬不得
見不忍返或走送百餘里乃歸歸復羣議曰生祀非
古也然曷以泄吾思請姑爲位書院中歲月日祝之

如我公在郡時恒詣院講也衆曰然哉癸亥仍返臨
安居歲餘以年七十當致仕移疾歸時建水民有從
弟殺其兄者獄辭具上官某俄拘繫平民拷訊之誣
服或曰自檢舉譴輕府君曰使平反是民得不寃吾
且賴以釋吾咎也不然殺人以救官吾不忍爲府君
在郡十年優戲人至不入郡境署非賓友至厨舍蕭
然公暇讀書莊坐而已念牧令蒞民最近嘗錄所作
戒貪檄以規僚屬到府謁延接懇懇如家人或具得
其清苦狀輒出所餘俸金贈之勅勉爲廉吏待左右

以君子長者之行雖奴婢未嘗盛怒詈辱之者旣退
家居置義田以收族遇窮乏輒復周卹諸親屬故舊
婚葬無力者仰助焉往來城鄉過里門必步里中老
人多喜問臨安時事府君具言其地瘠民勤儉風俗
淳厚急賦役稀爭訟嘗亦有豪暴害鄉里者然官長
必具知之法不能少恕也因以教鄉人其老人益感
嘆加禮府君嘗獨居一室蚤起坐一榻終日無惰容
或手寫所著文或觀書夜半不輟念郡縣志舊多缺
略諸蠹臣之節率鬱抑而弗光也乃求鄉先生遺事

如前明甘公霖張公澤王公來聘及

國朝趙公煥文皆有所紀述以勸忠時時爲

不孝等道

先世忠厚勤苦旁及遠親古老諸隱德可稱者作服
系述略志焉朔望謁家廟必誠忌日罷酒不樂拜跪
恒嘯唏流涕然諸子姪蚤孤貧無以業多分財經紀
之務周析身受者自以爲甚於所生羣從兄弟不衣
冠不見率以爲常先是府君久在外

不孝

等以卜地

難故先祖母之喪迄未克葬丙寅葬於辜家冲之虎

形牌距吾家十里前葬十餘日府君策一衛徑山路

崎嶇中不假人杖扶自乘下朝暮至虎形牌葬所虎
形牌者高可數百步至則陟其顛督視子孫工匠營
治壙兆葬畢府君據地哭子孫以下三四十人跪至
山麓皆哭失聲於時觀者旣嘆嗟其敬且誠又羨其
嬰鑠無衰態暇日與族人故舊有恩者往來飲酒爲
娛樂在坐年皆六七十許或已面黎黑齒脫目亡瞳
病寒嗽強步履須杖乃行而府君周旋其間揖讓如
禮卽不孝等亦且私喜竊以爲從此以往可屆期頤
也丁卯府君在城居日取介亭筆記居暇邇言等書

刪正之介亭筆記歲丁巳作也時軍務填委府君晝
閱兵練延見吏民晝守禦策羽書夜數至草檄應之
遣馳去復徐理日行案牘毋曠毋懈已漏盡燭炮奴
子立斂睡倚屏風僵府君方兀坐數拭墨引紙自書
作筆記桐城姚先生鼎稱爲有德者之言足爲世益
者也鈔古文哀爲二集梓焉秋八月 不孝景綬景綬

爾維

由江甯試歸見府君方服袷衣貌微瘠退與兄
弟私語竊竊然憂府君亦似自覺其衰刻杖髹之嘗
持以出入戶外今年戊辰元日祀先祖畢子婦入拜

賀顧府君顏色甚怡越三日忽中寒疾和葱汁湯以

進翼日漸瘳時

不孝彥和

當赴京會試府君趣治裝

往勿憂也自後每旬日疾間作間止餌劑未嘗數日

離矣然猶編定介亭詩集日手鈔數章會後生八九

人課制藝文六月遣

不孝景綬景綬爾維

仍試江甯

而留

不孝郁才甸

待七月間忽病咯血飲數劑愈而

瘳顧甚猶手勅至江甯曰塲前宜靜養也爾等在旅

舍不必與閒朋友往來我病漸可瘳勿以我徒亂心

意然

不孝景綬

等私念甚試舉遽買舟歸風阻不得

進至以八月二十九日

不孝旬

出逐而泣乃知府君

病下泄又旬日餘矣入見於牀下府君曰爾亦知我

日夜望爾也乎令出試藝引燭就枕上視視數行輒

倦而休如是者四五旣並報罷則曰第不第命也不

可不益讀書自是府君病日加藥物弗靈

不孝

等計

蒼黃無所從出九月十六日府君命

不孝爾維

取我

古文來某序某行當易幾字某傳從其子孫請也當

以家傳別之

不孝

等泣受命夜未半呼取紙筆曰我

不學仙不學佛何言今一言留以示爾則命

不孝景

級識之曰坦居平境嚴守正關何元何妙天上人間

吾生平之爲人大端如此又戒不孝等勉爲正人及

經理喪葬事餘無佗言至十八日夜氣不絕如縷不

孝等泣問所患苦應曰吾一身困劣不堪因指心曰

幸此處終不動耳俄刻之間慘遭大變嗚呼痛哉不

孝彥和憶自正月拜辭已成永訣不孝景綬景紱爾

維行能無似至不得博一第爲吾親懼不孝等呼號

莫從出入靡措形影斷絕遺訓在耳痛可言哉痛可

言哉惟念府君志聖賢志言仁義言諸治家守官處

已接物大端皆以誠敬自持久而弗懈此 不孝 等所
爲椎心泣血不敢以言之亡實重辱先人也謹述平
日所及見聞之概略與生卒年月官職系次當載者
具列於篇伏祈

當代大人先生有道德而能文章者錫之誄銘則 不孝

等世世子孫感且不朽府君生於雍正十三年乙卯
八月初二日酉時卒於嘉慶十三年戊辰九月十八
日亥時享年七十有四乾隆庚寅舉人戊戌進士

誥授朝議大夫吏部考功司主事考功司員外郎稽勳司

郎中乾隆己酉陝甘鄉試正考官雲南臨安府知府
護理迤南兵備道卓異候陞加五級紀錄六次配吾
母胡恭人

誥贈恭人監生諱熾公女先府君卒行實詳府君服系述
略中子七長不孝彥和乾隆甲寅舉人揀選知縣娶

夏氏諱文相公女次

景綸

乾隆己酉舉人先府君卒

娶楊氏名敘倫公女次

不孝郁才

附監生娶胡氏諱

炳蔚公女次

不孝景綬

監生娶胡氏諱序楷公女繼

丹徒沈氏乾隆辛卯進士歷任直隸房山福建光澤

南平縣知縣諱沆公女次 不孝旬 候選縣丞娶趙氏

諱志皋公女次 不孝景綏 邑庠生娶洪氏候選州同

名鑒公女次 不孝爾維 郡廩生娶翁氏乾隆乙未進

士候選知縣諱立準公女又陳氏監生諱藻玉公女

孫十六長慶娶趙氏邑庠生諱景星女 不孝彥和

出次皖瞻邑庠生娶黃氏嘉慶辛酉副榜現任大和

縣教諭名鼎女繼丁氏諱超凡女次望岳邑庠生娶

李氏名蔭堂女次慶苾娶鄭氏名確存女俱 不孝郁

才出次慶夔娶丁氏名星垣女 不孝彥和 出次慶草

聘潛山熊氏監生名象福女

不孝景綬

出今嗣景綸

次慶藻聘洪氏監生名光湖女

不孝甸

出次慶芝聘

劉氏名口口女次慶蕙聘胡氏名最賴女俱

不孝郁

才出次慶蓉聘洪氏監生名淮女次慶奎聘趙氏名

械材女俱

不孝甸

出次慶蘅殤

不孝景綬

出次慶芭

次慶華次慶孫俱

不孝爾維

出次慶獲

不孝景綬

出

曾孫六從忠望岳出從恕慶苾出從思慶萼出從志

皖瞻出從惠望岳出從懋慶苾出聘不備載孫女九

曾孫女一嫁字俱士族府君所著有介亭筆記八卷

居暇邇言二卷介亭文集六卷介亭外集六卷臨安府志二十卷于役迤南記二卷北上偶錄三卷服系述略一卷介亭詩集附南旋草一卷獨秀山房四書文一卷四書文續編一卷并付梓行世

景綬景綬

不孝孤哀子

彥和郁才

泣血稽顙謹述

爾維

賜進士出身

誥授榮祿大夫兵部左侍郎加三級紀錄十次年愚弟邵

自昌頓首拜填諱

介亭文集目錄

皖江江濱源岷雨著

卷之一

重修臨安

文廟大成殿告成記

重修表忠祠記

六廉堂記

彙錄前明司功題名碑記

讀邯鄲旅次無名氏題壁記

讀葉縣王孝子道碑記

爲前明建水州牧劉君家屬立墓記

復習我六鄉義館碑記

復建水義倉夏賑記

卷之二

臨安府志序

國朝滇南詩略序

家鑑堂先生四書遺文序

贈友人之官粵西序

贈龍里令丁昌序

贈羅徵士覲恩序

贈張愷歸葭州序

送楊東有孝廉歸里序

卷之三

上朱石君師請建前明甘御史鄉祠書

與邑紳士請建前明御史甘節愍公鄉祠書

與考功舊友書

再與考功舊友書

復黃屋堂書

前明周太僕行實補遺

前明御史甘節愍公史志補略

前明贈光祿少卿張公事略

前明副總兵王公事略

國朝贈封邱主簿趙公事略

卷之四

孟子鈔

世系弁言

左氏春秋鈔跋

六廉計羣吏論

論古揭

言戒

險說

邊防說一

邊防說二

邊防說三

邊防說四

卷之五

諭八屬慎選館師札

諭八屬清查學田札

再諭八屬清查學田札

諭八屬義學租穀歸官經理札

諭習戕在城紳士捐輸登雲書院脩膳札

諭臨安紳士修志札

卷之六

陳臨安招募鄉勇狀

陳威遠兵練不敷堵防狀

請調納樓土練赴威遠協防議

查勘抱母恩耕鹽井工程課款議

條陳稽查所屬夷地事宜議

諭臨安居民投充鄉勇文

諭阿迷居民協防苗匪文

諭曲江居民協防苗匪文

招撫威遠猺夷文

告納樓楊泗廟鎮江王文

受業李國柄校字

介亭文集卷之一

皖江江濬源岷雨著

重修臨安

文廟大成殿告成記

嘉慶甲子秋七月臨安

文廟大成殿董理者以工功既訖告知臨安府事江濬源
諷日率僚屬行舍菜禮紳耆偕來子弟在列觀者填
溢不諱而虔禮畢廼進諸生而敦勸之曰吾徒去

聖人之世二千二百有餘年其如天如日月之光容不可

擬而贊矣然踵代以來後先興起進而與列乎

聖人之徒者熾熾焉諸生無謂去

聖遠而率自薄也日誦易詩書春秋禮樂之文凡所以篤其實者在茲矣日聞君臣父子夫婦昆弟朋友五倫之教凡所以力學而至於成人者不外索矣望泰山之高不能窮其極未嘗不可循其麓而躋之沿東海之廣不能盡其涯未嘗不可觀其濶而邇之瞻仰

聖人而志思效法者亦事在敏求而已予於諸生忝一日之長茲喜

廟殿重新敬揭無忘師表之意爲諸生告不敢有浩大之
說以崇侈之也諸生其競自勤勤哉

重修表忠祠記

敬惟我

國家錄敍忠義遐邇不遺凡百臣工仰承

德意闡幽振隱罔敢弗虔臨安西關外曰表忠祠者前明
巡按劉公維奏准敕建以祀南征交趾先後與難之
臣及從死諸軍士也旣而祠燬於兵

國朝康熙庚午前守黃君明陞任去位屬署篆丁君煒
就故址而新之迄今已百有九年牆垣漸頽藻績殊
舊葺治之任守土者其曷可辭顧進而瞻謁考之堵

碑劉公所請崇祀者自乃祖節愍公儁以逮黃公福
陳公洽馮公貴侯公保劉公昱呂公毅劉公子輔易
公先何公忠計凡十人迨丁君踵修乃復增八例不
應祀之都督黃中又未知始自何時並以巡按劉公
與知府丁君序琨甘君一驥陳君鳴陽暨同知楊君
浚附祀於其間享非其類神不居歆名實弗符亦疑
於濫於是濬源惴惴焉惟祀事不肅無以慰英靈之
是懼及退而稽核明史本末此心愈益缺然也論當
日先後征討諸公自舊所祀十人而外如忠烈張公

輔雖未嘗以是時殉節然三定南陵厥功甚偉必將
循黃忠宣之例一體崇祀然後於禮稱且宜其餘死
芹站者尙有若薛公崑死廣源者有若高公士文死
盤灘者有若徐公政死四忙者有若陳公汝石朱公
多蒲而且陳公忠以清化之戰死周公安以富良江
之戰死徐公麒蔡公容以邱溫之戰死伍公雲琴公
彭以茶籠之戰死李公任劉公順顧公福崔公聚史
公安陳公鏞李公宗昉潘公禔桂公勝馮公智皆以
昌江之戰死又是時若建水之施公大節洪公秀王

公綸或死於力屈或死於城陷載在乘志者亦粲然
甚明白事同體異靈爽幽沈非所以發潛德之光勵
薰臣之節也於是飭匠庀材重輝祠宇取今所考正
宜祀者三十有五人第其官階贈諡參伍爲神牌並
附從死軍士八十萬人於其右而以疾以失機歿於
兵間者概不與焉工旣藏功爰諏日陳牲醴而虔妥
之嗚呼古履危致命之士自遂其志豈嘗覲後世名
哉而浩氣精光不可磨滅鬱盤而必發遲久而彌彰
繼自今位次布昭春秋休享神有依於顯列鬼無厲

於荒原而謁是祠者亦因以低徊嚮往歆動其忠義
之思則庶幾哉禮幽贊明斯舉不爲無助書於碑以
遺遠無爲慙不文焉已

六廉堂記

吏部準古天官冢宰其位次視戶禮兵刑工五部爲
尊隸司有四而考功糾察內外官吏案牘浩繁居文
選稽勳驗封三司之強半號稱難理甲於諸司顧三
司之有堂也向各本其職之重者爲之名文選曰澄
敘稽勳曰孝治驗封曰寵錫皆森乎有額之縣也而
考功之堂百五十年來未始立名以樹額司長感而
嘆焉曰是亦觀瞻所由肅顧名思義宜克咸也於是
取周官計吏之意額爲六廉諏曰豎建訖因與酌盞

於堂交錯相易曰吾儕服官於此激揚鉅典贊理資
焉聞先達有言官考功者非具仁恕勤思之性而行
之以公虛明斷罔克副其任之重而治其事之繁茲
堂之取義於廉也爲羣吏舉劾所取先而吾儕夙夜
在公儆於有位夫亦所以自鏡安在其不同然也誦
正直是與之雅歌神之聽之當自有在是額大書深
鏤赫然在堂繼續而來者聯步旅進昂首注觀斯於
扶樹官方庶亦一助乎僉曰允哉乃屬稽勳司郎中
兼考功司事江濬源記於碑

彙錄前明司功題名碑記

前明司功題名之碑三嘉靖之碑載自永樂以來其始建者也而礱石之年不復可辨矣厥後有萬歷二十六年戊戌之碑又有天啓三年癸亥之碑然萬歷之碑於除授陞遷後四三年者皆牽連以附載而天啓之碑並載至崇禎癸未而止則是二碑者亦未能確指其立於何時也顧惟歷年久遠兩剝風摧其大書姓名以及細書出身鄉貫並官階所歷累勲贈謚之甚詳者率多漫漶黣黣難於識別雖諸公後先輩

出每有事功氣節自能不腐之實載在史傳本末粲然初不繫此碑之存否也然溯曩時勒珉之意榮名爲寶垂示方來省覽悚企之資有在乎是不及今校其缺微新其波磔遲之又久恐遂後而失其時難乎其考而復也決矣茲周謀同官搨其殘碣之尙可辨者并以文選稽勳驗封三司之碑互相左證計得郎中百九十有七人員外郎百二十有五人主事四十有三人謹依倣原有款次彙爲一碑召工人磨石而重鐫之然後有明二百餘年司功之題名入我

國朝百五十年仍還其舊嗣是意復畱之百年可以無
壞而承宣於茲者亦咸護惜而存之相與覽其姓氏
考鏡其人庶嚮往之遐思端有屬焉則此碑之不專
爲前人修名而立也其亦未或有疑矣是役也校讐
完備惟桐城方君藹庭之力爲多大小楷書則溧陽
史君竹圃任之而記其始末於碑者懷寧江濬源也

讀邯鄲旅次無名氏題壁記

癸丑季冬濬源奉

天子命出守滇之臨安於是月二十有五日生抵邯鄲旅舍見過客詩章滿壁無不以盧生之夢爲詞者獨右壁有無名氏楷書數十行惓惓懷念窮民極道其困憊情形敦勸往來諸公振而救之俾無失所濬源讀之旣竟反復沈思悚然而有嘆也曰嗟乎斯殆近日慈惠之師欲推廣其所嘗自試者歟抑亦有心人自悼卑賤不得展布因書以告之當路庶幾聞澤覃敷

也歟以今瀛海編戶霑濡

德化髓浹肌淪宜不至有困於瘡痍靡所呼號之實象顧
天地好生人猶有憾聖如堯舜病在安人承

天子命而儼爲民牧謂天下咸已康乂不復念小人之依
者乃我

國家所必黜者也惜乎題壁之人其言僅存而其姓氏
不可識矣使其列於司牧行其所言吾知必能體民
之情恤民之瘝凡所以廣

朝廷之容保追傳記之循良者庶其在此此乃書之上

考於名不媿者乎豈弟之頌何直古人予是以紀而
述之形於詩歌用自警悚並以告牧民之君子共覽
觀焉

讀葉縣王孝子道碑記

余自襄城至葉縣汝墳橋見道旁有曹江日朗之碑
初不知其所謂及下車觀左方題名並讀碑陰所載
祁君有仁詩章乃知爲吾同年楊君令儀宰葉縣時
表章王孝子希曾而立者也孝子爲葉之唐邨人方
乾隆辛丑秋汝旁之水盛漲適隔岸演劇孝子隨其
父渡水往觀迨日暮旋歸人咸爭渡時同小艇者七
十餘人行至中流以重不能勝羣遭覆溺孝子忽從
水中躍出倉皇號呼不見其父因復入水求之殉父

以死次日眾屍上浮而孝子與其父之屍最後乃僵
抱而出兩手環結急驟解之不能開里人驚異哀憐
殮而合塚葬焉事聞於縣縣令楊君謂其與孝女曹
娥投江覓父事千古同悲此曹江日朗碑所以名也
余惟碑不載孝子出身本末意不過邨野之民未嘗
學問而其舍生殉父出於至誠處造次顛沛之時慷慨
激昂直足以驚鬼神而薄雲日以今求之在孝子
自行其志歸於所安身後之餘名何暇計及惟是屬
有風化之責者隔絕鄉里采聽未周每虞至行就湮

無由勸善而楊君之令於葉也廉明慈愛旣去見思
觀其揭此於四達之衢風示士民俾知感發古稱教
民之政務在明倫若吾楊君不媿矣吾取道於斯念
孝子之行仁人之風均爲人心所由厚於是紀次而
歌詠之希與曹女往事並廣其傳爲世大勸云爾

爲前明建水州牧劉君家屬立墓記

劉君四川舉人崇禎

十七年任

建水牧

仕宦而遭遇喪亂崎嶇兵戈之間勢蹙時窮不暇爲
全家保妻子之計以至闔門殉難葉葬荒原如前明
建水州牧劉君傳家屬自焚事可哀也已蓋我

皇朝初定燕京大師未及南下臨安在滇之邊徼於順治
四年丁亥被川寇張獻忠餘黨李定國等率賊攻城
屠殺甚慘是時劉君之妻何氏偕女存存及家屬凡
二十有七人先城陷一日俱自焚以死攷之劉君北

山行紀曰余亦有家先幾同難瘞骨白鶴之山今城北十里而遙是其地也然而平林曠野無主之塚纍纍望若鳥伏蠶叢迹而求之不可得臨安紳士憑弔久之茲議於白鶴附近官山累土爲墳標以碑碣酌歲時之酒招幽鬱之魂而屬余爲文告之余無以辭也曰

暴乎寇乎生敢妄希猛乎火乎死奮先幾二十七命逃賊虐威得正而斃於義何違所最慘但鬼未有歸荒邱委骨靡究是非嘯鵠在野黯宵血揮唳鶴棲樹

晴晝號飛吾徒過此疇弗歔歔迺闢境壤築土四圍
一抔徧臨有冢巍巍樹之新碣日照星暉以時奠醑
惟羊與豨魂兮不昧是享是依

復習義六鄉義館碑記

滇南去

神京萬里先賢仿古鄉學遺意建置通省義館綜計六百五十有餘所載在彙記歷歷可稽習義之隸於臨安也地小以僻自縣城義館而外有甸頭甸中甸尾與衣化念俄說之六鄉夷民雜居邨寨羅布從康熙雍正以逮乾隆初歲宰是邑者次第倡率鄉之紳耆建立學舍捐輸館租歲延儒師司其訓課俾六鄉子弟有志向學者咸得就近肄習於其間以此見前之君

子敬承

國家廣敷文治之至意勉振興雖在刀耕火種被殫
荷蠶之鄉不蠻貊視之而鄒魯期之其事平以易其
制周以詳卽百世守之可也無如事經積久漸次因
循塾師之課不勤而租穀或旁侵其額邇年以來有
司見其然以謂六鄉義館之設徒成虛文遂徇紳士
之請將年獲館租盡裁而歸之在城書院嗚呼爲是
舉者苟以取便於近城漢人之子弟而不求其平曾
亦思凡屬邨夷自此坐嘆地僻無師家貧廢學俗不

更化咎將安歸而顧任意顛蹶如是哉且試悉心酌
之書院束脩縱有不足祇宜清理縣前義館之租石
合併爲公尙屬事可通融無虞隔礙至於六鄉邨民
力能延師者寡亦鮮克裹糧負笈就學城闕惟使各
鄉之館有其舉之無敢或廢庶師儒之教不阻於遐
陋其後生小子資性聰明者旣得以誘之觀感奮興
競於成材而致用卽顛愚不能造就之人亦使之自
其幼穉之時朝夕於先生之側習聽漢言解識漢字
粗知家居有父子兄弟夫婦之大義在外有尊敬長

老親睦姻族鄉鄰之大端不日不月曠然大變其俗
恒必由之茲據該民人李宗尹李思道等籲請仍復
義館於鄉原設額租各歸各館竝懇給示勒石垂之
將來以邨野之民而見能及此屬有興賢育才之責
者其何說之辭爲此示給甸頭等六鄉民人勒石遵
守凡爾各鄉義館均還其舊其租穀各照原置之額
全給塾師以供脩脯爾等自茲以往尙益勉思前人
愛爾邨民之義舉相與督爾子弟敬禮先生早夜之
閒環立聽講浸潤詩書之澤薰蒸絃誦之風彬彬乎

夷進於夏秀者不愧

盛世之吉士樸者亦爲太平之良民仁壽恬熙曷其有極
至若各館塾師則爾等務公舉才品兼優之士由本
父母官酌選送館竝隨時稽其課程以收實效慎勿
私阿所好擅專延請之權也其或藉設館爲名垂涎
館租致滋影射侵吞之弊則有有司之法在禦之勿

忽

復建水義倉夏賑記

建水好善之士倣周官振窮恤貧遺意購置公田收其租入米而廩之曰義倉每歲夏冬二季出以賑環城而居鰥寡孤獨廢疾無告之人使各有以養其生而紓其急是舉也載在志乘井井有條其肇端未嘗不善已而相次因循情僞遞變蓄租坐耗弛而不振者有年及武功張君來守茲土紳士縷列始之所以興及繼之所以廢者請爲釐定章程而使復復其時以忘墜淹久瘁力經營然後冬季之賑歲如其舊而

夏賑尙猶缺然也頃紳士某某等以舉一廢二未慊於心又議彷彿前規復行夏賑而屬予導揚其事俾卒有成功竊惟吾徒之居鄉黨也誼敦調恤寧惟是好行其德而煦嫗之恩云爾哉蓋亦博愛之仁行而宜之義有不苟止而已顧盛事以倡舉爲難而有其舉之難必其不廢迨旣廢而使復舉且使無廢之不舉則事理之尤難者也茲承累歲積廢之餘凡酌盈劑虛爲窮民思終而維始者罔不委曲詳盡足以繼老成之懿躋揚閭里之醇風詩曰維桑與梓必恭敬

止是真能摠恭敬之誠者矣又曰不愆不忘率由舊
章是真能樹率由之準者矣予推而叙之將拭目以
觀義事之貽自前賢者踵行如昨而窮民歷暑寒之
月日均有藉以給朝夕頌仁人之功德弗諼也嗚呼
君子敦善行何處不勉况眾志齊一不畏難而中止
則亦何爲不成哉